

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին 26.10.2023թ. թիվ 2317316142 որոշումը բեկանելու և վարչական իրավախախտման վերաբերյալ գործի վարույթը կարճելու մասին

<< 18 >> 12 2023թ. 7-13 12593

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս, վերանայելով Կարապետ Խաչատրյանի թիվ ՄԴ/97342-23 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Քաղաքացի Կարապետ Խաչատրյանը (ծանուցման հասցե՝ Արմավիրի մարզ, քաղաք Արմավիր, Ռ.Եղոյան փողոց, 18-րդ տուն) դիմումով խնդրել է վերանայել վարչական տույժ նշանակելու մասին թիվ 2317316142 որոշումը՝ նշելով, որ իրավախախտումը կատարել է իր ինքնազգացողության վատացման պատճառով, ինչից հետո դիմել է հիվանդանոց:

Դիմումի քննարկման արդյունքում պարզվել է, որ վարչական ակտը ենթակա է բեկանման հետևյալ պատճառաբանությամբ.

<<Տեսանկարահանող կամ լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 3-րդ հոդվածի 1-ին մասի համաձայն՝ վարչական վարույթի իրավախախտման հատկանիշների պարզման փուլում իրավախախտումը հիմնավորող ապացույցը իրավախախտումն ամրագրած տեսանյութն է կամ լուսանկարը, որը պարունակում է նաև տեխնիկական միջոցով արձանագրված տվյալները: Ըստ նույն հոդվածի 2-րդ մասի՝ որպես իրավախախտումը հիմնավորող ապացույց վարչական կամ դատական կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Վարչական իրավախախտումների վերաբերյալ ՀՀ օրենսգրքի 251-րդ հոդվածի 1-ին մասի համաձայն՝ վարչական իրավախախտման վերաբերյալ գործի ապացույցներ են համարվում ցանկացած այն փաստական տվյալները, որոնց հիման վրա օրենքով սահմանված կարգով մարմինները (պաշտոնատար անձինք) հաստատում են վարչական իրավախախտման առկայությունը կամ բացակայությունը, տվյալ անձի մեղավորությունը այն կատարելու մեջ և գործի ճիշտ լուծման համար նշանակություն ունեցող այլ հանգամանքներ: Ըստ նույն հոդվածի 2-րդ մասի՝ այդ տվյալները հաստատվում են հետևյալ միջոցներով՝ վարչական իրավախախտման վերաբերյալ արձանագրությամբ, վարչական պատասխանատվության ենթարկվող անձի բացատրություններով, տուժողի, վկաների ցուցմունքներով, փորձագետի եզրակացությամբ, իրեղեն ապացույցներով, իրեր և փաստաթղթեր վերցնելու վերաբերյալ արձանագրությամբ, ինչպես նաև այլ փաստաթղթերով:

Վարչական տույժ նշանակելու մասին թիվ 2317316142 որոշմամբ ամրագրվել է, որ 14.10.2023թ.-ին ժամը 23:39-ին՝ ՀՀ Մ-5 32,3կմ Ակնալիճ գյուղի հատվածում <<HYUNDAI>> մակնիշի 81SL001 հաշվառման համարանիշի ավտոմոբիլի վարորդը գերազանցել է սահմանված արագությունը 16կմ/ժ-ով:

<<Էջմիածին բժշկական կենտրոն>> ՓԲԸ-ի կողմից տրված 27.11.2023թ.-ի տեղեկանքի համաձայն՝ քաղաքացի Կարապետ Արծրունու Խաչատրյանը 15.10.2023թ.-ին ժամը՝ 00:20-ի սահմաններում դիմել բժշկական կենտրոն, Զարկերակային հիպերտենզիա ախտորոշմամբ :

Ուսումնասիրությամբ պարզվել է, որ դիմումատուն 14.10.2023թ.-ին ժամը 23:39-ին՝ ՀՀ Մ-5 32,3կմ Ակնալիճ գյուղի հատվածում <<HYUNDAI>> մակնիշի 81SL001 հաշվառման համարանիշի ավտոմոբիլով երթևեկել է 96կմ/ժ արագությամբ, հանելով արագաչափ սարքի հնարավոր սխալանքի 10կմ/ժ չափը, բնակավայրում գերազանցել է երթևեկության սահմանված արագությունը 16կմ/ժ-ով, ինչը կատարել է ծայրահեղ անհրաժեշտությամբ պայմանավորված:

Դիմումատուն Ճանապարհային ոստիկանության վարչական բողոքների քննության բաժնում տված իր գրավոր բացատրությամբ հայտնել է, որ իրավախախտումը կատարել է <<HYUNDAI>> մակնիշի 81SL001 հաշվառման համարանիշի ավտոմոբիլով իր ինքնազգացողության վատացման պատճառով, ինչից հետո դիմել է հիվանդանոց:

Վարչական իրավախախտումների վերաբերյալ ՀՀ օրենսգրքի 17-րդ հոդվածի համաձայն՝ վարչական պատասխանատվության ենթակա չէ այն անձը, որը թեև սույն օրենսգրքով կամ վարչական իրավախախտումների համար վարչական պատասխանատվություն սահմանող այլ նորմատիվ ակտերով նախատեսված գործողություն է կատարել, սակայն գործել է ծայրահեղ անհրաժեշտության վիճակում, այսինքն՝ մի այնպիսի վտանգ վերացնելու համար, որը սպառնացել է պետական կամ հասարակական կարգին, սոցիալիստական սեփականությանը, քաղաքացիների իրավունքներին ու ազատություններին, կառավարման սահմանված կարգին, եթե այդ վտանգը տվյալ հանգամանքներում չէր կարելի վերացնել այլ միջոցներով և եթե հասցված վնասը կանխված վնասի համեմատությամբ ավելի նվազ կարևորություն ունի:

Նույն օրենսգրքի 252-րդ հոդվածի համաձայն՝ մարմինը (պաշտոնատար անձը) ապացույցները գնահատում է իր ներքին համոզմունքով, որը հիմնված է գործի՝ իրենց ամբողջությամբ վերցված բոլոր հանգամանքների համակողմանի, լրիվ և օբյեկտիվ հետազոտման վրա, ղեկավարվելով օրենքով և սոցիալիստական իրավագիտակցությամբ:

Այսպիսով, վարչական վարույթի ընթացքում հիմնավորվել է դիմումատուի կողմից ճանապարհային երթևեկության կանոնի խախտումը ծայրահեղ անհրաժեշտության վիճակում կատարելու հանգամանքն, ուստի վերը նշված որոշումը ենթակա է բեկանման:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին մասի 4-րդ կետով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 26.10.2023թ. թիվ 2317316142 որոշումը բեկանել և վարչական իրավախախտման վերաբերյալ գործի վարույթը կարճել:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ Վարչական դատարան՝ օրենքով սահմանված կարգով և ժամկետներում:
3. Սույն որոշման օրինակն ուղարկել Կարապետ Խաչատրյանին:

